

Jablanica, 15.12.2009.godine
Broj:507 /09

**ZAPISNIK I ZAKLJUČCI SA ŠESTE SJEDNICE
PREDSJEDNIŠTVA SKUPŠTINE SAVEZA OPĆINA I GRADOVA
FEDERACIJE BOSNE I HERCEGOVINE**

U Jablanici je dana 15.12.2009. godine održana Šesta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Savez).

Sjednici Predsjedništva Saveza prisustvovalo je **8** članova, i to:

1. Husejin Smajlović, načelnik Općine Zenica,
2. Hasan Ajkunić, načelnik Općine Bugojno,
3. Ermin Hajder, načelnik Općine Bosanski Petrovac,
4. Amer Čenanović, načelnik Općine Ilidža,
5. Salem Dedić, načelnik Općine Jablanica,
6. Rasim Omerović, načelnik Općine Kalesija,
7. Vlado Alilović, načelnik Općine Vitez, i
8. Dragana Solaković, pomoćnik Gradonačelnika, Grad Sarajevo (po ovlaštenju).

Pored gore navedenih, sjednici su prisustvovali i: **prof.dr. Neđo Milićević, prof.dr. Ejup Ganić, SSST, gđa Lejla Abdurahmanović, SSST, gđa Alenka Kvesić, Općina Široki Brijeg, gđa Azra Fejzić, Općina Kakanj, g-din Slaviša Šućur, GAP, gđa Vesna Travljanin, Direktorica Saveza, gđa Zlata Turkić, viši saradnik za rad sa skupštinskim komisijama i institucijama vlasti, gđa Selma Fišek, saradnik za pravna pitanja, g-din Amir Kupusija, viši saradnik za informisanje i odnose sa javnošću, i g-dica Šejla Hasić, viši saradnik za projekte.**

G-din Smajlović pozdravlja prisutne i zahvaljuje g-dinu Dediću na gostoprimstvu i predlaže Dnevni red.

Dnevni red je jednoglasno usvojen.

1. Usvajanje Zapisnika i Zaključaka sa Pete sjednice Predsjedništva

G-din Smajlović stavlja Zapisnik i Zaključke sa predhodne sjednice na glasanje.

Zapisnik i zaključci sa Pete sjednice su jednoglasno usvojeni.

2. Izražavanje solidarnosti članica Saveza povodom ranjavanja načelnika Općine Živinice

Gđa Travljanin izvještava prisutne da je Stručna služba Saveza poslala obavještenje za medije, koje nije objavljeno, te da je Stručna služba u stalnom kontaktu sa Općinom Živinice i načelnikom. Predlaže da se oformi delegacija ispred Saveza općina i gradova FBIH koja bi posjetila načelnika. Također, predlaže da se pošalje i pismo nadležnom organu ispred Saveza u kojem bi se objasnilo da je načelnik vršioc javne funkcije.

G-din Šućur predlaže da Savez pokrene inicijativu za izmjene Krivičnog zakona gdje bi se načelnici definisali kao vršioci javnih funkcija, kako su oni i najizloženiji. Smatra da zakon to treba prepoznati.

G-din Smajlović predlaže da se to ostavi za slijedeću sjednicu.

G-din Dedić smatra da bi bilo kolegijalno da se na današnjoj sjednici usvoji zaključak da se ponovo kontaktiraju mediji i da uvažavaju stav Saveza.

G-din Smajlović predlaže da to bude tokom posjeta delegacije Saveza.

Prijedlog je jednoglasno usvojen.

3. Zakonodavne aktivnosti Saveza:

3.1. Nacrt Zakona o šumama (Izvještaj o trenutnoj fazi izrade Nacrta zakona)

G-din Bubalo izvještava prisutne da su predstavnici Radne grupe Saveza sa Federalnim ministarstvom poljoprivrede, vodoprivrede i šumarstva proveli dva dana u Vogošći sa predstavnicima ministarstva, kako bi se usaglasili članovi zakona. Sve je usaglašeno osim nekoliko članova. Odlučeno je da će obje varijante ići u Prijedlogu prema Parlamentu FBiH. Konstatuje da je Obrazloženje dosta loše napisano, te predlaže da Savez napiše Obrazloženje oko dva člana koja nisu usaglašena. Na Parlamentu je da odluči koja će to verzija biti.

G-din Šućur smatra da treba organizovati radionicu o izradi strategije za lobiranje za Zakon o šumama.

G-din Bubalo smatra da se treba uključiti i Zakon o cestama.

G-din Čenanović konstatuje da kanton i Federalne direkcije naplaćuju ovo zemljište. Stalna je tendencija na prijenos nadležnosti na jedinice lokalne samouprave ali bez prenosa adekvatnih finansijskih sredstava. Ovo su velika sredstva, i realno je tražiti procenat.

G-din Šućur podržava g-dina Čenanovića uz konstataciju da putevi dižu cijene zemljišta. Infrastruktura diže cijene i da treba tražiti realan procenat.

G-din Hajder predlaže da se organizuje radionica oko Zakona o šumama. Stanje je dosta konfuzno na terenu i ne treba gubiti vrijeme.

G-din Smajlović konstatuje da se treba lobirati za ova dva člana.

Prijedlog je jednoglasno usvojen.

3.2. Konsultiranje Saveza na radni materijal nacrta Zakona o lokalnoj samoupravi Unsko-sanskog kantona i na prednacrt Zakona o lokalnoj samoupravi Kantona Sarajevo

Gđa Travljanin izvještava da je Savez dobio dva materijala. Stručna služba je konsultirala članove komisije.

Gđa Turkić konstatuje da su svi kantoni bili obavezni da donesu zakon. Unsko-sanski i Sarajevski kanton su poslali svoje nacрте na mišljenje koje je proslijeđeno komisijama. Do sada je Stručna služba dobila dva pisana i jedno usmeno mišljenje na Zakon u Unsko-sanskom kantonu.

Gđa Solaković konstatuje da je Grad Sarajevo dostavio svoje sugestije, te da je suština nezadovoljstvo rješenjima u Zakonu. Kanton Sarajevo je samo ponovio stare forme i zakon nije funkcionalan.

G-din Hajder konstatuje da općine u Unsko-sanskom kantonu nisu dobile nacrt Zakona u Unsko-sanskom kantonu na mišljenje.

G-din Šućur smatra da bi bilo dobro da se pri Savezu organizuju kantonalne koordinacije.

G-din Smajlović predlaže da se zauzme zajednički stav za sve kantone, i to:

1. da svi kantoni usaglase svoje zakone,
2. da se ne prepisuju odredbe nego da svaki kanton uradi odredbe shodno svojim specifičnostima, te da se prošire prava jedinica lokalne samouprave,
3. da se konsultuju jedinice lokalne samouprave na koje se zakon odnosi, i
4. da se konsultuje Savez pri usvajanju zakona.

Prijedlog je jednoglasno usvojen.

4. Informacije o:

4.1. prijedlogu Zakona o zaposlenicima u organima jedinica lokalne samouprave

G-din Omerović izvještava prisutne da je prisustvovao sjednici Odbora za pravdu, opću upravu i lokalnu samoupravu Doma naroda Parlamenta FBiH. Smatra da sastanak nije bio konkretan. Odbor je razmatrao naš zakon. Uz to izmjene Zakona o državnoj službi u FBiH su također u proceduri. Generalno prihvataju naš zakon da ide u parlamentarnu proceduru. Moramo lobirati da se zakon usvoji. Trebao bi biti na Dnevnom redu u januaru ili februaru.

G-din Smajlović konstatuje da treba ići sa nacrtom zakona, te da se treba dogovoriti sa Direktoricom Travljanin oko lobiranja.

Prijedlog je jednoglasno usvojen.

4.2. Realizaciji zaključaka sa prethodne sjednice Predsjedništva

Gđa Travljanin izvještava prisutne da su svi zaključci sa prethodne sjednice Predsjedništva realizirani. Naglašava da bi jedini problem mogao nastati oko Prijedloga zakona o izmjenama i dopunama zakona o slobodi pristupa informacijama u FBiH. Naime, Stručna služba Saveza je amandmane, kako je to i zaključeno, prosljeđila Federalnom ministarstvu pravde. Međutim, ministarstvo nije uvrstilo te

amandmane u svoj Prijedlog izmjena zakona. Predlaže da se nađe ovlašteni predlagač koji bi predložio te amandmane.

G-din Dedić konstatuje da je iznenađen sa činjenicom da ministarstvo nije uvrstilo amandmane Saveza.

G-din Smajlović predlaže da se oformi delegacija koja bi se sastala sa Federalnim ministrom pravde kako bi se prijedlozi i obje strane usaglasili.

G-din Šućur predlaže da on bude predlagač, te da će to i napomenuti u predstojećem sastanku sa ministrom Vidovićem.

Prijedlog da se održi sastanak sa Federalnim ministarstvom pravde oko usaglašavanja Prijedloga zakona o izmjenama i dopunama Zakona o slobodi pristupa informacijama u FBiH.

4.3. konsultiranju Saveza na Prijedlog Zakona o predškolskom odgoju i obrazovanju Hercegovačko-neretvanskog kantona

G-din Dedić izvještava da je kao član Predsjedništva bio zadužen za konsultiranje svih općina HNK u zauzimanju stava na Prijedlog zakona o predškolskom odgoju i obrazovanju Hercegovačko-neretvanskog kantona. U prilogu svim članovima daje Odluku sa sastanka za koju predlaže da se usvoji kao stav Saveza te proslijedi nadležnim organima.

G-din Hajder uz to naglašava da je kolegij općina Unsko-sanskog kantona također zauzeo stav da se Zakon o raspodjeli javnih prihoda mora mijenjati u korist jedinica lokalne samouprave.

G-din Šućur predlaže da se oformi komisija koja će se baviti ovim pitanjem. Ako je neki kanton donio odluku o prenosu nadležnosti veoma je lako utvrditi koja su sredstva utrošena na te nadležnosti, te općine mogu tražiti isti procenat. Tako da bi se raspodjela mogla vršiti na osnovu broja učenika.

G-din Omerović konstatuje da je ovaj Zakon donesen u Tuzlanskom kantonu. Jedinice lokalne samouprave iz Tuzlanskog kantona su tražile finansijska sredstva na taj način. Treba oštro nastupiti kako bi se postigli rezultati.

G-din Smajlović predlaže da se usvoji Odluka općina HNK kao generalni stav Saveza i proslijedi nadležnim organima.

Prijedlog je jednoglasno usvojen.

4.4. održanim radionicama o nacrtu Zakona o stvarnim pravima Federacije BiH

Pisana informacija o održanim radionicama o nacrtu Zakona o stvarnim pravima Federacije BiH je jednoglasno usvojena

4.5. projekat «Ustavne promjene – debate u lokalnim zajednicama», rezultati dosadašnjih debata

G-din Kupusija izvještava prisutne da su održane sve javne rasprave u Federaciji, gdje su učestvovali, prof.dr. Neđo Milićević, prof.dr. Kasim Trnka, prof.dr. Božo Žepić i prof.dr. Mirko Pejanović. 16.12.2009. godine u državnom Parlamentu će se održati konferencija za novinare, gdje će se zauzeti jedinstven stav po pitanju Ustavnih reformi u BiH.

Prof.dr. Milićević pozdravlja prisutne. Konstatuje da se u sadašnjem Ustavu jedinica lokalne samouprave i lokalna samouprava uopće ne spominju. Oba entiteta su jedinstvena u stavu da to treba promijeniti. Jedinice lokalne samouprave na teritoriji cijele Bosne i Hercegovine moraju imati ujednačena prava. To je obaveza prema svim međunarodnim dokumentima. Što se tiče zauzimanja stava, Federacija i RS imaju različita razmišljanja na kojem nivou bi se trebalo posvetiti više pažnje lokalnoj samoupravi.

G-din Šućur konstatuje da je i stav Vijeća Evrope da se jače tretira pozicija lokalne samouprave u BiH.

G-din Smajlović konstatuje da se trebaju zaštititi prava i uskladiti terminologija.

Informacija je jednoglasno usvojena.

4.6. završenom projektu «Evropske integracije i upravljanje fondovima Evropske Unije» u organizaciji InWent-ta i slijedeći koraci

Gđa Alenka Kvesić pozdravlja prisutne i predstavlja i kolegicu Azru Fejzić iz Kaknja, koja je također učestvovala u InWent treninzima. Ukartko izvještava o jednogodišnjem treningu i daljnjim koracima koji uključuju seminare za zainteresovane općine o saznanjima steknutim tokom treninga.

G-din Smajlović čestita učesnicama i konstatuje da je potrebno što prije pokrenuti takve seminare.

Informacija je primljena k znanju.

4.7. održanoj javnoj raspravi pred Ustavnim sudom Federacije BiH u postupku zaštite prava na lokalnu samoupravu Općine Bihać

Gđa Fišek izvještava prisutne o raspravi pred Ustavnim sudom FBiH gdje je Općina Bihać pokrenula postupak zaštite prava na lokalnu samoupravu jer je Skupština Unsko-sanskog kantona doznačila sredstva mjesnim zajednicama bez konsultovanja općine.

Informacija je primljena k znanju.

4.8. «Beacon schema» - završna ceremonija dodjele nagrada

G-din Kupusija izvještava prisutne o završnoj ceremoniji dodjela Beacon statusa.

Informacija je primljena k znanju.

4.9. izvještaj o imenovanju člana Upravnog odbora projekta «Podrška EU jačanju kapaciteta institucija regionalnog i lokalnog razvoja i razvoja malih i srednjih preduzeća u BiH»

G-din Smajlović izvještava da je na prijedlog Stručne službe imenovan g-din Ismar Alagić iz Općine Tešanj koji ima dugogodišnje iskustvo u EU integracijama.

Imenovanje g-dina Ismara Alagića je jednoglasno usvojeno.

5. Potpisivanje Memoranduma o razumijevanju između Saveza općina i gradova Federacije BiH i Sarajevo School of Science and Technology

Kako je zaključeno na prethodnoj sjednici Predsjedništva g-din Husejin Smajlović i prof.dr. Ejup Ganić su potpisali Memorandum o razumijevanju sa ciljem pisanja i implementiranja zajedničkih projekata vezanih za e-tehnologije u općinama FBiH. (op. Zapisničara)

6. Tekuća pitanja

6.1. Imenovanje delegacije Saveza za sastanak sa direktoricom Direkcije za evropske integracije

U delegaciju Saveza imenuju se g-din Husejin Smajlović, g-din Rasim Omerović, g-din Vlado Alilović, g-din Amer Čenanović i gđa Vesna Travljanin.

Prijedlog je jednoglasno usvojen.

6.2. Za mjesto održavanja slijedeće sjednice Predsjedništva Saveza predlaže se Općina Ilidža.

Prijedlog je jednoglasno usvojen.

G-din Dedić zahvaljuje svima na prisustvu uz nadu da se Općina Jablanica pokazala kao dobar domaćin, dijeli prigodne poklone prisutnima i poziva na zajednički ručak.

Nakon što su sve tačke Dnevnog reda zaključene, Šesta sjednica Predsjedništva Saveza općina i gradova FBiH okončana je u 14:00 sati.

Zapisničar
Šejla Hasić, s.r.

Predsjednik Predsjedništva Skupštine
Husejin Smajlović, s.r.